

LIWAKATE JUDAS

Judas eledi nioxoa Jesus, codaa nakatotedigi Goniotagodi nigijo nogopitedibigimece ditibigimedi. Judas didikotibige nigina Aneotedogoji aneniditediogi me nepilidi, codaa me doweditedeloco Jesus. Eo libodigi micota minoa niigaxinaganadi awitakagaga anodiigaxinagatece ane beyagi. Yalagata micota Aneotedogoji me iwi anigotediogi codaa me iloikatidi nigicoa niigaxinaganadi awitakagaga. (Awiniteloco 2 Pedro 2.1-17). Nigidiaagidi Judas dipokotiogi me dinoniciwaditibigiwage monibeotibigege Jesus me dopitedijo. Aneotedogoji ida loniciwaga meote me digica aneyamatice nigina anodiotece. Joanigidaa leegodi Judas me dogetetalo Aneotedogoji.

¹Ee Judas, ee liotagi Jesus Cristo, codaa ee nioxoa Tiago. Jidikotibige nigina oko Aneotedogoji ane eniditediogi me nepilidi, nigina oko aneliodi me yemaa Aneotedogoji, ane Godiodi, nigina oko Jesus Cristo ane doweditedeloco. ²Jemaa Aneotedogoji mepaanaga gaduwikodenitetiwaji, codaa meote gadaalegenali mele, codaa magaga epaanaga ikee me gademaanitetiwaji.

Icoa niigaxinaganadi awitakagaga (2 Pedro 2.1-17)

³Yokaagetedipi yemaanigipi, domaga eliodi me jemaa me jidikotibigagajitiwaji me idalagata anodaagee Aneotedogoji meote me godewigatace okotawece. Pida jakadi menegegi leeditibige me jidikotibigagajitiwaji me gadoniciwagati manienaganegeni niginoa niigaxinaganegeco gotiwagatakanegegi, codaa makapetege nigina anoyemaa moiigi niigaxinaganegeco gotiwagatakanegegi, liigaxinaganegeco Goniotagodi ane nenyagaditetema nigina anoyiwagadi, liigaxinaganegeco anidioka limedi mida ane jaogate. ⁴Igaataga idiwa goneleegiwadi ane lakapetedipi Aneotedogoji jagawatege loiigi Goniotagodi me digicata ane yowoogodi naga dinawanagaditege, oada jogodiigaxinagatece niwitakeco, odoletibige modiigaxinagatece me jakataga me jaogate niginoa lidagataka godolaadi ane beyagi, igaataga modi Aneotedogoji me daga godiloikatiditeda leegodi me dagaxa meletedogodomi. Codaa agodibatege Jesus Cristo, anokijoatece me Goniotagodi. Nigijo jotigide Aneotedogoji nagakaa yalagate anigoteta me iloikatidi niginoa niigaxinaganadi awitakagaga.

⁵Ele mowoogotitiwaji anodaagigote Aneotedogoji me iloikatidi nigina ane lakapetedipi, jemaa manalakitibigetiwaji nigijo Goniotagodi Aneotedogoji me

nogatedice nigijo loiigi miditaga niigo Egito aneiticoace me nawikodeega, pida nigidiaagidi jagaga yaagadi nigijo oko ane dogoyiwagaditeda miditaga nigijo loiigi. ⁶Codaa icoa aanjotedi ane dogoyemaa moibake ijokijo nigica nagatetigi Aneotedogoji ane yajigotediogi, odao jogoyaladi nigijo ane domaga iticoace, ja noditicoaci, ja lakapetedipi Aneotedogoji. Joanigidaa leegodi Aneotedogoji meote me niwilogojedipi digoida ica natinedi miditaga ica nexocaga, dinigoetece galeena ane dogoyakadi monoga. Odaa jigidaagee jogonibeotege nigica noko Aneotedogoji nige iwi codaa me iloikatidi iditawece leegodi niginoa ane beyagi loenataka. ⁷Codaa analakitibigetiwaji nigijo nigeladimigipitigi nigotadi Sodoma ajaa Gomorra, codaa nigijoa eletidi nigotadi ane lipecaawadi anagaga nakapetegi Aneotedogoji liciagi nigijoa aanjotedi me nakapetegi. Nigidi nigeladimigipitigi nigidiwa nigotadi odoletibige me loomatewa okanicodaagica oko, negepaa dinoomatewamigipi goneleegiwadi, codaa miwaalepodu idaagee jagaga dinoomatewamigipi. Odaa nigijo noko Aneotedogoji naga niloikatiditidiniwace me yalegi, ikee anodaagee nigica noko nige iloikatidi codaa me iigetedicogi miditaga noledi ane daga ipe inatawece nigina ane lakapetedipi.

⁸Nigijoa niigaxinaganadi awitakagaga owo ane beyagi liciagi nigijo nigeladimigipitigi Sodoma ajaa Gomorra. Onadi micataga daga ligeedi niginoa loenataka ane beyagi. Odaa noomatewa okanicodaagica oko, odao jigidaagee mowo ane beyagitema epaa lolaadi. Odaa agodibatege Goniotagodi me iige lewiga, codaa beyagi modotagatibige niaanjotedi Aneotedogoji. ⁹Pida otegexaagaga Miguel ane iige aanjotedi anigidaagee. Nigijo me dinotigimadetege diaabo leegodi anepaga yakadi Moisés lolaadi, odao Miguel agica daga beyagi me dotagatibige diaabo, codaa aibake nagatetigi daga laagedi diaabo nigijo diaabo naga dotagatibige Aneotedogoji. Pida Miguel onexaageeta, “Gadapetegeni Goniotagodi.” ¹⁰Pida nigidiwa niigaxinaganadi oiwo nigica ane digica moyowoogodi. Codaa owote niginoa lolaadi lidagataka, micoataga niginoa eijedi ane dogoyowoogodi nigica ane beyagi, odao niginoa ane beyagi anowote icota me yaagadi nigidi oko.

¹¹Nagoodi nigijoa goneleegiwadi! Aneotedogoji iloikatidi leegodi modioteci naigi nibeyacaga digo mijotaga Caim ane yeloadi epaa nioxoa, codaa mowo liciagi Balaão libatiigi me doletibige me dinigaanyetece dinyeelo. Pida Aneotedogoji icota me yaagadi leegodi me lakapetedipi digo mijotaga Coré ane domaga yemaa migotiogi nigijo loiigi Aneotedogoji me lakapetegipi, pida Aneotedogoji ja yeloadi Coré. ¹²Nigina matecigitiwaji maniodi mikeeni madinemaani, odao nigina midi nigijoa goneleegiwadi me gagiwepoditiwaji, aniboligatibigiwaji. Codaa adinajacagaditibigiwaji, pida niodaga, codaa dagaxa me nacipaga agonalagatibige nigidieledi oko. Micataga nigina lapioyagajegi jayogo ane yapidi. Odaa nigijoa goneleegiwadi awitakagaga liciagi niginoa loolatedi ane nadeegi niocodi, pida agica ebici, codaa liciagi niginoa nialeli ane dagaca ela nigina me domaga limedi metaye, nigidiwa nialeli yadilo leegodi idiwatawece litodi yadilo monapoce. ¹³Nigidiwa goneleegiwadi micataga niginoa nebekadi akiidi-eliodi, codaa niginoa libaketedi ane goboliga liciagi

nigina latiamaga ebekadi. Nigidiwa goneleegiwadi liciagi niginoa yotetitedi ane wakagi, odaa ipe miditaga nexocaga, igaataga Aneotedogoji ja ilakidetedi nigica nimeri ane dagaxa me nexocaga midiaagiticoace nigepaa ganigicatabige.

¹⁴Jigijo ixomagaticoace ciinco anida aneetege licogegi Adão, ane laamipi Enoque. Enoque yatematitedibece lowooko Aneotedogoji nigijo naga yalagata nigidiwa niigaxinaganadi awitakagaga icaagica eletidi oko liciagi, nigijo negee, “Digawini! Goniotagodi enagi lixigagawepodi ganige liwokodi miilitedi aanjotedi lilokagawadi. ¹⁵Enagi me iwi anigotediogi inatawece oko, odaa diigenatakatediogi moiloikatidi inatawece nigina ane lakapetedipi. Iloikatidi leegodi inatawece niginoa loenataka ane beyagi modakapetege, codaa leegodi inatawece niginoa lotaga ane gonitiadi nigina abeyacagaga modotagatibige.”

¹⁶Nigijoa goneleegiwadi idioka limedi me dinalomegetiwage, codaa odinotigimadetege niginaeledi oko. Idioka limedi mowote niginoa lidagataka ane beyagi, codaa idioka limedi me diniwenigide. Ele modotagatibige niginaeledi oko inokina nigina modoletibige anigida nigaanye.

Judas ibodicaxi loiigi Goniotagodi codaa najoitiniwace

¹⁷⁻¹⁸Yokaagetepi yemaanigipi, akamagakaamitiwaji jaganalakitibige nigijoa lotaga nigijoa liigexedi Goniotagodi Jesus Cristo, nigijo nogoyalagata nigica anicota, nigijo nogoditece nigicoa owidijedi nokododi nige dinikee goneleegiwadi anetigadamenitiwaji. Owote ane beyagitema Aneotedogoji nigina anepaa yemaa lolaadi meo. ¹⁹Nigidiwa goneleegiwadi owo mawalacetiwage. Niginoa epaa lidagataka iige lewiga nigidiwa goneleegiwadi, odaa agica Liwigo Aneotedogoji mijotaga.

²⁰Pida, akaami yokaagetepi yemaanigipi, idioka limedi maxawani oninicebeci me yowoogodi codaa moyiwagadi niigaxinaganegeco gatiwagatakanegegi Aneotedogoji ane yajigotedagawatiwaji. Codaa ikanitiwaji Liwigo Aneotedogoji miniaa iige gadwooko nigina motaganegeni Goniotagodi. ²¹Idioka limedi madinoniciwagatitiwaji mawii nigica Aneotedogoji ane yemaa leegodi me gademaanitetiwaji, nigina manibeonitege Goniotagodi Jesus Cristo micota meote midiokaanaga limedi me gadewikitiwaji miniwataga leegodi me gadiwikodenitetiwaji.

²²Iwikodenitiwaji nigina baanaga doletibige moika monakato Goniotagodi. ²³Nigidi oko doide Aneotedogoji me iloikatidi minitaga noledi ane daga ipe, axawani nigidi oko mewi monakato Goniotagodi amaleegaga iwoko nigica noko nige iloikatidi nigina oko abeyacagaga. Pida nigiwikodeni, nigina бага adinowetitiwaji adagawii niginoa ane beyagi anowote. Oxaxini niginoa libeyacegeco. Nigina mowo ane beyagi, micataga daga napioyagadi codaa me lowoodi.

Judas dogetetalo Aneotedogoji

²⁴Jemaa mokotawece jogeegatalo Aneotedogoji ane yakadi me gadotetenitewaji me digikani me iwagati Goniotagodi, codaa yakadi me gadadanite lodoe me digicata gabatiigi digoida ditibigimedi aneite meliodi me datale, codaa yakadi meote meliodi maniniitibecetiwaji lodoe.

²⁵Oniwatece Aneotedogoji ane Gonewikatitogodi. Leegodi nigijo aneote Goniotagodi Jesus Cristo, jemaa minatawece oko oiwenigide Aneotedogoji, codaa monelecatate, anida nimawenegegitetece inoatawece aninoa, codaa ida nagatetigi me iige inoatawece maleedigicata daga yoe inoatawece. Jemaa minatawece oko oiwenigide Aneotedogoji nigina natigide codaa nigepaa ganigicatibige. Odaa jigidaagee. Amém.